



Fundasaun Mahein (FM), 31 Maiu 2017

Komunikadu Imprensa

Kna'ar Prezidente Repúblika ba Política Defeza, Seguransa no Relasaun Internasionál

“Lisaun sira husi mandatu Prezidente Repúblika 2012-2017”

Prezidente Repúblika nia kna'ar atu garante unidade nasional no hanesan Komandante Supremu Forsa Armada Prezidente Repúblika iha responsabilidade boot liu ba estadu nia funsionamentu regular, unidade nasional ho seguransa no soberania nasional. Iha ne'ebé Prezidente Repúblika deit maka bele deklar funu no halo dame, no iha kompetênsia kompetênsia sira seluk tuir Konstituisaun nia haruka. Hodi asegura diak liu Prezidente Repúblika nia servisu tulun husi orgaun servisu seluk ba dezenvolvimentu asaun institucional no promove prioridade política sira ne'ebé difine ona, Prezidencia Repúblika iha orgaun servisu ne'ebé fó tulun maka Casa Sivil, Casa Militar, Gabinete Prezidente Repúblika no Konsellu Administrativu.

Monitorizasaun FM nia identifika, *primeiru*, Konsellu Superior Defeza no Seguransa hanesan orgaun konsulta Prezidente Repúblika nian la funsiona ho diak iha reuniaun Konsellu Superior Defeza no Seguransa. Nune'e durante ne'e la iha enkontru regular ne'ebé akontese. Iha ne'ebé tuir dadus ne'ebé FM asesu durante tinan 2012-2017, so iha deit reuniaun maizumenus dala sanolu husi reuniaun Konsellu Superior Defeza no Seguransa nian. Lolos durante tinan lima mandatu Prezidente Repúblika nian enkontru regular ka ordinariu Konsellu Superior Defeza no Seguransa nian tenke akontese dala ruanolu. Portantu tuir lei reuniaun Konsellu Superior Defeza no Seguransa akontese kada fulan tolu. Ho ida ne'e hatudu katak funsionamentu Konsellu Superior Defeza no Seguransa la hala'o nia kna'ar ho diak tuir mandatu ne'ebé iha.

Segundu, kona-bá kompetênsia Prezidente Repúblika nian nomeia no exonera Chefe Estado Maior General Forsa Armada nia (CEMGFA), Vice-CEMGFA no Chefe Estado Maior Forsa Armada nian sai polêmika iha tinan sira liu ba. Nune'e Governu no Parlamentu Nasional ho Prezidencia Repúblika ida-idak defende no debate maka'as tebes. Maske nomeasaun ne'e tuir mandatu husi Konstituisaun no Estatutu Orgânica Forsa Armadas nian Prezidente Repúblika maka nomeia no exonera. Polêmika ne'e rezulta husi dezisaun final ida halo Prezidente Repúblika lasai lolos tiha hanesan Komandante Supremu Forsa Armadas. Ida ne'e justifika husi protesta ne'ebé superior militar nian lakohi sai husi militar, ikus mai hanaruk-tan sira nia mandatu ho alterasaun ba estatutu militar nian hodi hakotu polêmika entre Governu, Parlamentu Nasional ho Prezidente Repúblika.

Terseiru, aleinde kompetênsia ho orgaun sira seluk, kna'ar konstitusional Prezidente Repúblika nian kona-bá kompetênsia iha relasaun internasionál. Prezidente Repúblika deit maka iha dominiu kona-bá relasaun internasionál sira inklui asuntu

defeza no seguransa nian. Signifika katak akordu internasionál hotu-hotu tenke atraves husi reuniaun Konsellu Superior Defeza no Seguransa, iha prosesu ba akordu internasionál sira nian iha area defeza no seguransa. Maske nune'e FM hakfodak wainhira Prezidente Repúblika Taur Matan Ruak durante nia mandatu hatete iha akordu, protokolu no memorandu sira entendementu barak maka Timor-Leste asina ho nasaun oin-oin, oituan deit maka hetan implementasaun. Nia hatutan embaixador sira keixa ba nia katak nasaun hotu-hotu hakarak asosia Timor-Leste nia susesu maibe akordu sira la implementa. Hanesan Prezidente Repúblika hatete tiha ona katak akordu kooperasaun barak maka la implementa no Governu rasik laiha baze dadus. Signifika katak durante ne'e la iha akordu ida ne'ebé debate iha Konsellu Superior Defeza no Seguransa, no dalaruma Governu la fo informasaun ida ne'ebé detallu ba Prezidente Repúblika kona-bá akordu sira ne'ebé asina.

Kuartu, Iha tinan 2014-2015 mosu insidenti ne'ebé provoka operasaun konjunta forsa Polisia no F-FDTL, no iha situasaun ikus liu ho operasaun ne'ebé involve militar to'o Mauk Moruk mate. Mobilizasaun forsa seguransa hanesan estadu-de-sitú ne'ebé la'o iha situasaun ida estadu de normalidade nian laran. Hetan protesta maka'as husi organizasaun sociedade sivil no Provedoria Direitus Humanus no Justisa (PDHJ) kestionaria operasaun ne'ebé halo iha asaun sira balu justifika kona-bá sirkuntasia sira uza forsa nian ka uza forsa la tuir lei uza forsa nian no regra empenhamentu. Nune'e mosu lamentasaun no keixa husi comunidade. Nune'e operasaun sira hanesan ne'e konsidera hanesan pratika aat ne'ebé hatudu iha politika setor seguransa Timor-Leste nian. Ne'e hanesan lisaun prinsipal ida ne'ebé prezisa avalia fila fali bainhira involve militar sira iha atuasaun seguransa interna nian.

Ikus liu, FM nian preokupasaun wainhira orgaun soberanu sira haree deit ba sira nia kompetênsia no utiliza espasu legal sira hodi politiza asuntu sira nune'e. Sei sai dezafiu boot ba politika ne'ebé diak ba dezenvolvimentu defeza no seguransa iha futuro. Buat ida ne'ebé hatudu ona ho kazu rua ne'ebé sita ona iha leten. Ba futuro labele iha tan militar ida maka rejeita dezisaun husi nia superior. Ironiku liu-tan militar ida halo petisaun depois kontinua ka rekondus hikas nia mandatu. Ida ne'e husik hela presedente ba futuro kona-bá nomeasaun no ezonerasaun husi Prezidente Repúblika hanesan Komandante Supremu Forsa Armada nian no kompetênsia sira ne'ebé tutela ba Prezidente Repúblika tuir Konstituisaun no lei sira nia haruka.

Rekomendasaun

1. Rekomenda mantein komunikasaun ne'ebé efetivu entre Prezidente Repúblika ho orgaun soberanu sira. Hodi hotu-hotu hala'o nia kna'ar iha koridor ida tuir Lei no Konstituisaun nia haruka.
2. Rekomenda ba Prezidente Repúblika prezisa avalia servisu ne'ebé durante ne'e hala'o husi Konsellu Superior Defeza no Seguransa nia funsionamentu regular sira, iha ambitu nu'udar orgaun konsulta Prezidente Repúblika nian ba materia defeza, seguransa no soberania nasional.

3. Rekomenda ba Prezidente Repúblika aumenta Pelotaun Guarda Onra nian iha Gabinetei Apoiu Komandante Supremu Forsa Armada no Guarda Onra nian. Nune'e mos intensifika formasaun rekursu umanu iha nivel poliíiku no tékniku ba meteria defeza no seguransa ne'ebé integra iha Casa Militar.
4. Casa Militar mantein servisu hamutuk ho organizasaun sosiedade sivil sira nia partisipasaun atu fo hanoin konstrutivu bá dezenvolvimentu instituisional nian iha âmbito defeza no seguransa nian. Halo publikasaun ba relatóriu sira ne'ebé Casa Militar produs ne'ebé la'os konfidensial atu nune'e públiku bele hatene lalaok Prezidencia Repúblika nian no Casa Militar.

Atu hetan informasaun kle'an liu kona-bá asuntu ne'e bele kontaktu:

Nélson Belo

Diretor Ezekutivu

Email: direktor.mahein@gmail.com

Telemovel: (+670) 78316075 ka 77561184

Website: www.fundasaunmahein.org

